

TEZAUR LITURGIC
10 OCTOMBRIE

SLUJBA
SF. IERARH
INOCHENTIE
SMIRNOV,
EPISCOPUL
PENZENULUI
ȘI SARATOVULUI



MINEIUL PE OCTOMBRIE
MOSCOVA



Месяца октября в 10-й день Святителя Иннокентия, епископа Пензенского и Саратовского

На велицей вечерни

На Господи, воззвах: стихиры, глас 1.

Подобен: Начало ныне положим:

Ныне время наста, о празднлюбцы,/ во псалмех
и пениих прославити/ Бога, дивнаго во святых
Своих,/ воздвигшаго нам днесь Иннокентия
преславнаго,/ молящагося тепле о душах наших.

Песненными добротами/ украшается днесь
Церковь первородных,/ воспевающи невинности
тезоименитаго,/ святителя Пензенского и
Саратовского,/ яко предивна своего ходатая/ и
молитвенника о душах наших.

Троицы Пребезначальныя служителя предобра/ и
лжемудрствований посрамителя изрядна/ память
ныне нам наста./ Темже убо стецемся, людие,/

похвалити сего тщащся,/ яко велика земли наша
светильника/ и молитвенника о душах наших.

Ины стихиры, глас 4:

Сияет, яко солнце, светлостию/ память святителя
Твоего, Господи, Иннокентия,/ обличившаго нечестие
златословесными глаголы,/ человекоугодие и
высоковыйных превозношение посрамившаго,/
кротких землю достигшаго,/ егоже молитвами даруй
нам грехов очищение,/ яко Благ и Человеколюбец.

Врачуеши страсти и души просвещаеши верных,/
притекающих ко святей раце мощей твоих,/ ангелов
собеседниче, архиереев сопрестольниче,/ апостолов
единонравне, исповедников равностоятелю,/
преподобных сожителю, благоверия поборниче,/
предстателю наш, славне Иннокентие.

Многим воздержанием, святителю, жизнь твою
украсив,/ путь, ведущий в жизнь вечную, указал еси/
и евангельским учением шествовал еси,/ жестоким
же житием плоть твою изнуря,/ гордаго змия
воздержанием победил еси./ Темже, на Небесех
водворяясь,/ Богови предстоиши, святе

Иннокентие,/ Егоже моли согрешений оставление
даровати/ чтущим любовию святую память твою.

Слава, глас тойже:

Радуйся и веселися о Господе/ богоизбранная
паство святителя,/ ныне песньми венчаемого,/ яко,
такового светильника и отца себе имущи,/ духовная
чада нарекостеся,/ егоже прослави Бог знаменьями и
чудесы преславными,/ обильно исцеления
приходящим к нему дарующа./ Темже, припадающе,
ему возопиим:/ о, всеблаженне Иннокентие, отче
наш,/ непрестанно моли Всесвятую Троицу,/ да
Небеснаго Царствия уллучити сподобимся.

И ныне, Богородичен: Иже Тебе ради:

Вход. Прокимен дне. И чтения три святительская.

На литии стихира, глас 4:

Суетная мудрования отложше, блаженне,/
Православия держатися неотступно научал еси/ и,
стеснения скорбная претерпевая,/ восприятие
будущия радости провидел еси,/ да многотрудным
житием и ученьми/ источник приснотекущий
небесныя сладости/ нам, недостойным, покажеши.

Слава, глас тойже:

Вся убо могий о укрепляющем тя Христе,/ болезни
и немощи смиренно претерпевая,/ на Бога все
упование возложил еси,/ мирского же пристрастия
гнушаяся/ и сущая мира, яко не сущая, вменяя,/
чистым умом и немятежным сердцем выну Богу
послужил еси,/ темже, сосуд Святаго Духа явився,/
моли, святителю Иннокентие, помиловатися душам
нашим.

И ныне, Богородичен:

Несть душам нашим ослабы, ниже избавления,/
токмо молитвами Твоими, Мати Дево,/ и милостию от
Тебе Воплощшагося Спаса Христа,/ к Нему же
взываем,/ на ходатайство Твое надежду крепку
имуще,/ да спасет и сохранит всех нас,/ песньми Тя,
яко Богородицу, величающих.

На стиховне стихиры, глас 1:

О, блаженне святителю Иннокентие,/ егда
суетмудреннии восташа на Церковь Божию,/ мечем
обоюдоострым учения истиннаго сих посекал еси,/
верныя же щитом правоверия оградил еси,/ сего ради

поношения претерпел еси,/ да земли Русской
явишия/ новое и преславное украшение.

Стих: Нога моя ста на правоте,/ в церквах
благословлю Тя, Господи.

О, пречудне отче Иннокентие,/ ныне Церковь
Русская ублажает тя,/ яко тверда исповедника веры,/
чудес обильных реку источающего,/ и святителя
всечестна,/ паству твою добре упасшаго,/ мы же,
земнороднии,/ яко чада ко отцу, тебе вопием,/ еже
помиловатися нам в День судный.

Стих: Суди ми, Господи,/ яко аз незлобою моею
ходих.

О, славне Иннокентие,/ егда скорбныя
нахождения во смирении претерпел еси,/ тогда глас
Господень пресладкий на тебе исполнися,/ яко
изгнании правды ради блажени суть,/ сего ради,
венцем нетленным украсився,/ дерзновение велие от
Владыки приял еси,/ еже молитися о душах наших.

Слава, глас 8:

Земля Русская, духовно процветши,/ яко крин
прекрасный износит днесь/ святителя пречудна

Иннокентия,/ иже молитвами своими благоухавый
ю,/ явился нам великий заступник/ и ходатай о душах
наших.

И ныне, Богородичен, глас тойже: Безвестная Дево:

Тропарь, глас 5:

От юности смиренным нареченный,/ во
иночестве же чистоте тезоименный,/ духовная
мудрости любитель явился еси,/ златовещанный
благочестия учителю/ и лживых пагубных учений
обличителю,/ за Истину нечестивыми гонимый,/
незлобие и кротость проповедавый/ и паству
Пензенскую ревностне пасый,/ святителю всечестне
Иннокентие,/ моли Христа Бога умудрити нас во
спасение.

На утрени

На Бог Господь: тропарь святого дважды. Слава, и
ныне, Богородичен.

По 1-м стихословии седален, глас 3:

Чловецы ликуют духовно, обретоша бо
молитвенника и предстателя и, похвальными венцы
Иннокентия украшающе, яко угодника Христова

прославляют. Егоже молитвами, Господи, от страстей и бед избави нас.

Слава, и ныне, Богородичен:

Избави нас молитвами Твоими, Владычице, согрешений бездны, демонскаго озлобления, языческаго пленения и злонравных лукавейшаго вреда, да Тя, яко Избавительницу нашу, величаем.

По 2-м стихословии седален, глас 4:

Страдания за истину подъем, святителю, теми душу твою очистил еси, ныне же Христа Бога моли, да в доброделании нас укрепит, грехов очищение подаст и спасет души наша.

Слава, и ныне, Богородичен:

Настави ны на путь покаяния, уклоняющихся присно в безпутие зол и Преплагаго прогневавших Господа, Неискусобрачная Благословенная Марие, Заступнице Усердная рода христианскаго.

По полиелеи седален, глас 2:

Отребие миру, погружаему в пучине лжеучения, вменился еси, святе Иннокентие, но обаче не возможе ты разлучити от любви Божия, яже о Христе Иисусе,

Господе нашем, ни скорбь, ни теснота, ни самая смерть.

Слава, и ныне, Богородичен:

Востани, Пречистая Мати, и воздежи руце Твои молебне к Сыну Твоему и Богу купно со святителем Иннокентием, да избудем многих бед и зол, присно по грехом нашим обуреваемии.

Степенна, 1-й антифон 4-го гласа. Прокимен, глас

4: Священницы Твои оденуты в правду/ и преподобнии Твои возрадуются. Стих: Блажен муж, бояйся Господа, в заповедех Его восхощет зело.

Всякое дыхание: Евангелие от Луки, зачало 64.

По 50-м псалме стихира

Святителю отче Иннокентие,/ тобою мнози грады и обители хвалятся,/ Московския бо земли славное прозябение явился еси,/ град же святаго Петра и Новаграда честная обитель Юрьевская/ постническими подвиги твоими украшаются,/ земля Пензенская и пределы Саратовския/ процветаша, словесы твоими напаяеми,/ ныне же, во Граде

Небеснем вселяся,/ поминай нас, чтущих память твою.

Канон, глас 2, егоже краегранесие: Нищету духовную стяжати сподоби, отче.

Песнь 1

Ирмос: Грядите, людие,/ поим песнь Христу Богу,/ раздельшему море и наставльшему люди,/ яже изведе из работы египетския,/ яко прославися.

Небесный Царю, смиренную душу мою от скверн очисти и слова благодать низпосли, да возмогу достойно воспети угодника Твоего, преславного Иннокентия.

Имуще ты предстателя добра к щедрому Богу, нас, напастьми и обстоянии скорбными одержимых, укрепи, подавая руку спасения, святителю милостиве Иннокентие.

Щедр и незлобив пастве своей явился еси, отче Иннокентие, темже, Духа Божия исполненный, ума моего омрачение отжени, страстей бурю утиши, к безстрастия пристанищу управи и от злых устен защиты твоих молитв покровом.

Богородичен: Егда Божиим повелением от временныя жизни отъити хошу, Пречистая, бесовския руки мя свободи, Ангелы в спутники подаждь и рай вкусити сподоби, идеже Иннокентий святитель с безплотными лики сладости божественныя наслаждается.

Песнь 3

Ирмос: На камени мя веры утвердив,/ разширил еси уста моя на враги моя,/ возвесели бо ся дух мой, внемгда пети:/ несть свят, якоже Бог наш,/ и несть праведен, паче Тебе, Господи.

Припев: Святителю отче Иннокентие, моли Бога о нас.

Тя, смиренне Иннокентие, всесветла светильника, не под спудом, но на высоте свещника Церкви Христовы поставлена, усердно молим: светоносными лучами глубокую тьму греха отжени, неверных к познанию Истины настави, шатания умов низложи, нас же во Православии укрепи.

Уставил еси, премудре Иннокентие, струями твоего богоглаголиваго языка ложныя токи

суемудренных, иже, яко безсильнии, не возмогша
мутными водами лжеучения потопити ны. Темже
вопием ти: токи страстей наших изсуши и ко
благочестию настави.

Духа Божия исполнився, зловония века сего
низложил еси, кадильнице благовонная, Иннокентие
блаженне, и паству твою учением Православныя
Церкве облагоухал еси. Темже ты, яко наставника
предобра, верно восхваляем.

Богородичен: Упование и стена и тихое
пристанище еси людем Твоим, Пресвятая Дево,
Всесвятаго Сына Твоего умоли спасение нам улучшить,
да непрестанно в невечернем свете славу Триединому
Богу воспеваем.

Ин кондак, глас 3.

Подобен: Дева днесь:

Днесь святитель Христов Иннокентий/ предстоит
Престолу Божию/ и с лики святых за ны молится
Богу,/ емуже ныне со умилением покланяемся/ и во
псалмех и пениих величаем,/ обретохом бо
молитвенника ко Превечному Богу.

Седален, глас 3:

О, неизреченная благодать Божия! О, неизглаголанного Его смотрения! Честная мощи святителя Иннокентия ныне обретошася, души верных утешающе и на брань противу козней лукаваго укрепляюще. К нимже припадающе, усердно вопием: ущедри нас молитвами твоими, святителю Бога Всещедраго.

Слава, и ныне, Богородичен:

Иже Отцу Сопрестольный Сын на земли воплощся, яко человек, из утробы Твоея, Чистая, пройде, порфирию кровей Твоих в наше оболкийся естество, да падшия ны человеки возставит и Небеснаго Сиона граждане явит.

Песнь 4

Ирмос: Услышах, Господи,/ славное Твое смотрение/ и прославих, Человеколюбче,/ непостижимую Твою силу.

Храм Всесвятаго Духа, добродетельми сияй, миру явился еси, святителю честный, научение книжное прилежно стяжав, тайны неизреченная

судеб Божиих постигл еси, и списанием дел времен минувших верныя премудро во благочестии даже доныне наставляеши, да зовем благодарне: слава силе Твоей, Господи.

Оружием мудрости божественныя препрел еси нечестивых, исповедниче честный. Поношения и гонения за истину благодушне претерпевая, земную мудрость нивчтоже вменяя, непрестанно взывал еси: слава силе Твоей, Господи.

В Небесныя чертоги Ангели Божии вознесоша чистую душу твою, блаженне, идеже со святители и исповедники Престолу Всевышняго предстоиши, укрепльшему тя на подвиги велия, непрестанно взывая: слава силе Твоей, Господи.

Богородичен: Недвижимое утверждение веры и яко многоценный дар душам нашим, Богородицу во псалмех и пении духовных восхвалим, вернии, да избавит от мук вопиющих к Рождшемуся из Нея: слава силе Твоей, Господи.

Песнь 5

Ирмос: Света Подателю и веков Творче, Господи,/ во свете Твоих повелений настави нас:/ разве бо Тебе, иного бога не знаем.

Укрепляемь силою Троическою, преблаженне, проповедник велегласный пастве Саратовской явился еси, вопия: возвеличите Господа со мною, и вознесем Имя Его вкупе. Темже и мы Владыку Небесе и земли величаем: иного бо разве Тебе бога не знаем.

Юность свою постом и молитвою благоукрасил еси, мудре, и священства благодать непорочно стяжати сподобился еси. И ныне, Престолу Вседержителя предстоя, молися, славне Иннокентие, да от языка лукаваго и озлобления свободимся и огня вечнаго избавимся.

Святителей удобрение и исповедников похвало, чудес источниче, умоли Зиждителя, Егоже пришествие при дверех есть, обрести нам грехов оставление.

Твоих словес наставления, еже Православие в чистоте всем содержать, чужеземным же лжеучением

никакоже прилепятся, объяша всю землю Русскую, ты бо Вышнему выну взывал еси: инаго бо разве Тебе бога не знаем.

Богородичен: Яже миру мир подавшая и Начальника тишины рождшая, укроти волнение страстей моих, Чистая, и на камени безстрастия мя утверди, Сыну Твоему взывающа: инаго бо разве Тебе бога не знаем.

Песнь 6

Ирмос: *Ко Господу от кита Иона возопи:/ Ты мя возведи из глубины ада, молюся,/ да, яко Избавителю, во гласе хваления/ истины же Духом пожру Тебе.*

Житием твоим, а не токмо ликом, святителю Димитрию Ростовскому подобяся, душу твою, блаженне, яко рай богонасажденный, сотворил еси; безумнии же, яко сор, отринуша тя, не терпяще силы словес твоих. Темже, отче, и нас темных падений греховных избави.

Архиерей чуден и нравов исправитель и душ устроитель показался еси, ревностне о людех твоих пекийся, мирским же начальником противустал еси,

злоковарство и лихоимство тех обличая, святе
Иннокентие.

Туне есть тщание наше достойное пение тебе
сотворити, Иннокентие предивне, но, яко Христос
прият вдовицы две лепте, тако и ты не возгнушайся
похвальных словес наших и малый сей труд приими,
в похвалу тебе приносимый.

Богородичен: Избавльшися Тобою от бед и
скорбей, Мати Безневестная, и Тебе ради радость
получивше, Тя, яко Подательницу благую и
Заступницу верную, вси величаем.

Кондак, глас 8:

Священнаго и боговещаннаго проповедника/ и
дивнаго премудрости учителя/ вчинил еси, Господи, в
наслаждение благих Твоих и покой,/ труды бо онаго и
блаженную кончину/ паче всякаго всеплодия прием,/
едине Прославляяй святых Своя.

Икос:

Житие непорочное явил еси, святителю
Иннокентие, невинности тезоименный, и, веры ради
скорбных нахождения претерпев, чистою душею к

Престолу Господню притекл еси, прехвальне. Ныне же, райския пищи наслаждаяся, о иже на земли поющих тя Владыку Христа умоли, знаменьями и чудесы Прославляющаго святыя Своя.

Песнь 7

Ирмос: *Образу златому, на поли Деире служиму, / трие Твои отроцы небрегоша безбожнаго веления, / посреде же огня ввержени, орошаеми, пояху: / благословен еси, Боже отец наших.*

Скорбная искушения и лютая обстояния смирением попрах еси, тех и нас молитвами твоими избави, блаженне, вопиющих: благословен еси, Боже отец наших.

Пение псаломское воспеша людие, и при словесех: аз же, Господи, уповаю на Тя, душа твоя святая от тела разлучися. Нас же, на всемощныя молитвы твоя надеющихся, утверди непрестанно взывати: благословен еси, Боже отец наших.

О нас милостивныя твоя длани ко Владыце молебне простирай, святе Иннокентие, и, соблазнов избавляя, неотлучно с нами духом пребывай, отче

преподобне, наставляя в молитве звати Творцу:
благословен еси, Боже отец наших.

Богородичен: Да человеки падшия обожит, явился
Сын Твой, Владычице, совершен Человек. Сего убо
моли причастники Божества сотворити поющия:
благословен еси, Боже отец наших.

Песнь 8

Ирмос: *В пещь огненную ко отроком еврейским
снизшедшаго/ и пламень в росу преложшаго Бога/
пойте, дела, яко Господа,/ и превозносите во вся веки.*

О всеславнем прославлении твоём, святителю,
людие Руссии возвеселишася, явился бо еси
чудотворец изящный и ходатай пред Богом
предивный, Того умоляя о вопиющих: пойте, дела, яко
Господа, и превозносите во вся веки.

Божии Промыслом сохранены быша от
поругания святых твои, святителю Иннокентие,
аще и храм, идеже погребено бысть тело твое, от
безбожных разорися. Ныне же целы явишася и, яко
звезда пресветлая, просвещают всех притекающих к

ним и Богу зовущих: пойте, дела, яко Господа, и превозносите во вся веки.

Избави нас, святителю Христов, сетей вражиих молитвами твоими и окорми живот наш силою Всещедраго Бога, Емуже с тобою покланяемся, велегласно вопиюще: да благословит тварь вся Господа и превозносит во вся веки.

Богородичен: Отеческия славы не отступль, волею к нашей худости снизшел еси, Сладчайший Иисусе, и от Девы плоть приял еси. Еяже молитвами избави рабы Твоя от бед и скорбей.

Песнь 9

Ирмос: *Безначальна Родителя Сын, Бог и Господь,/ воплощся от Девы, нам явися,/ омраченная просветити, собрати расточенная./ Тем Всепетую Богородицу величаем.*

Тело твое честное, священне Иннокентие, с верою приступающим исцеления источает, страстей различных тьму отгоняет и светом невечерним просвещает всех, хвалящих тя.

Чистоту ума стяжав, Духа Святого жилище бы-
еси, богоблаженне, благодать же святительства прием,
проповедник изящный и учитель искусный показался
еси, научая люди православно исповедати в Троице
Единого Бога.

Едине Блаже, Христе Многомилостиве, в молитву
Тебе ныне приводим угодника Твоего Иннокентия. Не
презри ходатайства его грех наших ради, но помилуй
нас, верою взывающих: заступничеством святителя
нашего, Господи, помилуй нас.

Троицен: Тебе неприступному Богу и Славы Царю
Трисолнечному, Строителю и Промыслителю
всяческих, Единому Благому и Сущему, Божества
державу имущему, песнь Трисвятую воспевающе,
поклоняемся присно и непрестанно величаем.

Богородичен: Отроковице Всенепорочная, Мати,
Дево Пречистая, Сына и Бога Твоего милостива
сотвори нам и страстей лютых избави.

Светилен:

Веселится ныне земля Саратовская, людие же Пензенстии тебе покланяются и Христа величают, обретоша бо великое сокровище.

Слава, и ныне, Богородичен:

Владычице Всемиловитая, просвещение помраченных душ наших, Свет истинный миру рождающая, со святителем пречудным Иннокентием Сына Твоего и Бога умоли о всех нас.

На хвалитех стихиры, глас 4:

Жительство наше есть на Небесех,/ сице божественный Павел рече,/ ты же, святе Иннокентие,/ весь ум твой к Горним возвысив,/ прекраснаго онаго рая, еще в телеси сый, вкусити сподобился еси./ Темже ныне, с Горними лики водворяясь,/ нас, еще долу сущих,/ молитвами твоими присно ограждай.

Сила Божия в немощи совершается,/ тако глаголет Господь,/ ныне зрим слов сих на тебе преславное сбытие,/ яко немощен плотию,/ Духа усердный ратоборец показался еси,/ лжеименных учений усердный обличитель и доблестный

отгнатель./ Испроси и нам, отче Иннокентие,/ от
Подвигоположника Христа мужества дар,/ во еже
противостати духу мира сего,/ и молитвами твоими
нас присно ограждай.

Ины стихиры, глас 2.

Подобен: Егда от Древа:

Егда душа твоя разлучашеся/ от тленного сего
жития,/ тогда псалмопевца слышати сладчайший
глас,/ еже упование твое на Господа есть,/
сподобился еси, предивне Иннокентие./ Ныне же, в
рай сладости вчиняся,/ уже не в сених и
гаданиях,/ но лицом к лицу зриши Господа/ и
прославляеши Святую Троицу.

Егда страдания за истину претерпевал еси,/ тогда
во отречение и уметы себе самого вменил еси,/
святителю смиренне, отче Иннокентие,/ Бог же, зряй
вся тайная,/ на свещнице святительства тебе устави/
и венец нетленный тебе подаде./ Днесь же,
небесными и земными гласы ублажаемь,/ Господеви
помолися, исповедниче,/ от всяких лютых нам
избавитися.

Слава, глас 5:

Единому токмо Богу нашему/ всякую славу, честь и поклонение/ в душе и истине приносить верно подобает,/ тако от Церкви Божия научены есмы,/ но, яко подобие Его в себе возрастившия,/ да почтутся от нас святии Его,/ яко приснии Божии друзи и доблии венечницы,/ в ихже сонме, яко пресветлая звезда,/ Иннокентий святитель нам возсия./ Мы же к нему днесь тепле вопием:/ яко дерзновение стяжавый ко Спасу нашему,/ от всяких лютых молитвами твоими нас ограждай.

И ныне, Богородичен:

Земля Русская,/ дом Пречистыя Богородицы от лет древних нареченная,/ многия милости Ея улучи,/ темже и мы с верою и упованием сие вопием:/ не престай заступати нас, Царице и Владычице,/ пучины греховныя избавляющи/ и спасение душам нашим подающи.

Славословие великое, ектении и отпуст.

На Литургии

Блаженна от канона, песни 3-я и 6-я. Прокимен,
глас 1: Уста моя возглаголют премудрость,/ и
поучение сердца моего разум. Стих: Услышите сия,
все языцы,/ внушите, все живущии по вселенней.
Апостол ко Ефесеем, зачало 233. Аллилуиа, глас 4:
Уста праведнаго поучатся премудрости. Стих: Язык
его возглаголет суд. Евангелие от Иоанна, зачало 36.
Причастен: В память вечную будет праведник:

